

四庫全書

集部

欽定四庫全書

集部

果堂集卷十二

詳校官侍郎臣謝墉
助教臣常衡覆勘

總校官編修臣王燕緒

校對官中書臣陸湘

謄錄監生臣王宮

欽定四庫全書

果堂集卷十

吳江沈彤撰

墓表 墓誌 傳

周先生墓表

先生諱靖字牧寧號訥齋姓周氏吳縣人以學生入國子監明贈太常寺卿忠介公之長孫私謚端孝先生諱茂蘭之子也忠介以罵魏忠賢被陷死熹宗朝莊烈帝

立端孝上血疏懇父寃得建祠賜額兩世大節聞於天下先生好義性剛方凡有所為必求無乖於祖父之志自幼讀書著文不專尚科名事二親能殫其力問膳與安不間於蚤暮端孝即世處殯堂哭泣不飲酒食肉不脫衰經歷三年不怠方小祥而疾或勸之食肉先生不可曰有疾則飲酒食肉非禮與先生曰吾疾不至死卒不食先生工篆書汪太史琬以題額來請先生辭曰吾衰絰在身詎敢為人作書嗚呼喪禮之不講於吳中久

矣親喪尤人所至痛當自盡古人之所以觀其愛觀其理觀其志者皆在此也而或衣食居處忍而干吉其何以為人子幸尚得先生其人維持之而鄉里之子時復有聞風感激致哀敦禮以善居其喪者然則使人心之不亡而子道之不滅息者先生其庶幾乎喪除念

朝廷方纂修明史祖父大節並宜列而所據或有失實則不足彰信於後乃錄其事之本末入都上諸史館都中鉅公重其人爭羅致於家先生不肯即獨從陸清獻公

學期年德益進謁歸埠志養母教子弟遂修家譜刻先人遺書親友之罹大故者匍匐往救流俗事之害於名義者上書當事斥正之暇則纂經史賦詩研究六書而已以康熙四十九年三月十五日卒年六十六其年十二月四日長子縣學生鳳來葬先生於縣南橫山之新塋後二十餘年子監生鸞翔因妹婿徐大業以鳳來所撰事實請表其墓又數年乃克為之先生篆書人擬諸趙處士宦光所著有篆隸考異八卷汪太史為序盛稱

之太史著古今五服考異多先生為勘定云

嘉善魏君千里墓表

嘉善魏氏自明吏科都給事中彈魏瑞斃獄追謚忠節公諱大中者始大著忠節生孝烈先生諱學洢痛父死瑞難不食殉孝烈生孝隱先生諱允楠嘗刲股療節母嚴太孺人疾孝隱之子處士諱儒點者能善承其親蓋忠節為忠臣而子孫以孝聞者連三世君處士長子也諱為圻字千里生而敦敏事父母大父伯叔父皆得其

心年十八遭母卓太孺人喪既殯猶弗納水漿於口處士正色戒之曰禮毀不危身爾今若此身不將危矣乎乃朝夕進一溢米內閣學士磁州張公榕端之督學江南也聞君篤行且多學工文詞迎訓其孫於官署而君伯叔父相繼歿訃至痛不得視殮憑棺廢食與寢遂病則又慮親老連哭兄弟喪而更聞子病道遠不可得見將愈憂惻即強馳歸道中暑日劇竟不起垂涕泣呼父而卒年三十來弔者皆曰處士喪子有子君為諸生不

得志於舉場而所交皆當世知名士羣弟子多成學者
配蔣氏張氏皆克殫婦道二子正鑄正鏞以雍正三年
三月二日塋君於縣北先人兆次兩孺人祔又二年乃
以所撰事實因徐君大業請表其墓余嘉魏君克續其
祖父之孝而益之令名也故論列焉

顧府君墓表

雍正六年之春余偕顧君健游郡西諸山道竹塢見石
闕桀聳複澗重巒拱立環抱余嘉異之健曰健先府君

之墓也先府君性嗜山水故擇此地而葬焉遂言曰先府君平生喜讀書敦行不怠葬於是且十年而未獲刊銘將必以屬子余諾焉他日遂偕其兄邦極以所為行實來請其可後辭按府君諱濬字方水其先自應天徙居蘇之長洲曾祖士元國子監生祖國本父端皆縣學生府君少孤而貧晝夜不輟學數年補吳學生事母夫人能自節致贏備甘旨以得其歡母喪終三年未嘗齒見於弟教之學授之室而予之田親族之嫁娶喪葬不

能集事者出財物襄贊之所當為無不為不徇名不期報後或背恩反齧亦不之校也府君應鄉舉輒登鍾山眺大江數求先代諸名蹟晚歲乃於居第東疊石鑿池構小園日與親故游其中飲酒賦詩為笑樂年六十康熙四十五年九月六日以疾卒五十七年十二月五日葬吳縣華山天池西南隅之竹塢配吳氏子男四人女一人皆側室黃氏出長邦祿例貢生次朝樞湖北荊州右衛千總次濟美浙江紹興知府幼捷中書舍人頗好

古與余善女適申世夔孫男八人女九人銘曰六行維庸敏德其本為詭為急於人則損懿哉府君惟行之敦聞記必達嬉遊弗謾孰克知之曰親與黨不永厥垂後嗣何倣

贈山東布政使司參議沈公墓表

廣東文昌縣知縣贈山東布政使司參議分守登青萊道仁和沈公以乾隆十六年十一月壬申葬其縣半山里之臯亭山禮部侍郎長洲沈公德潛為之墓銘而公

子諸生廷懷心復以弟參議廷芳書請吳江諸生沈形
表其墓形嘗於侍郎所誦公之詩又嘗諾公子請編公
之古文校公之禮記類編公三子並兄事余其季直比
余於羣從且以文相切劘垂二十年間嘗述公之行誼
政事及學問之淵源形以是知公頗悉公諱元滄字麟
洲形體神清為人篤厚而專一事二親無所失親歿殯
斂如禮哀毀柴立外舅少詹事查公昇有恩於公其二
子後歿京邸公皆經紀其喪而歸其柩少詹之分纂佩

文韻府也公助之搜采進呈輒稱

旨其後以副榜貢生進經籍

聖祖以少詹故

命入

武英殿書局且稱其學問與其書法公在局編纂精勤
為同列冠康熙六十年授文昌知縣頗稱職而上官乃
以讒劾免公尋以他株累徵赴部竟戍寧夏不踰年而
卒以雍正十一年正月十七日年六十有八公交遊多

當世名人其以師事者在鄉邑則有若錢塘應嗣寅撫
謙鄞萬充宗斯大秀水朱檢討彝尊族父昭嗣佳在京
邸則有若吉水李尚書振裕仁和湯侍郎右曾海寧查
編修慎行入書局則有若長沙陳恪勤公瞻年而昭嗣
恪勤則北面焉皆時承指授獲益湛深故其類經能整
齊綱目有詳有要為古今文有遠識高論賦詩本性情
而出入杜韓蘇陸諸集尤卓然成家嗚呼公之學行如
此而困阤於晚歲當時莫不為公惜然歿未久而季子

中博學鴻詞科入仕累遷今官公得贈翰林院庶吉士
贈編修贈參議階至朝議大夫季子之為御史以直聲
著世又莫不以有子如此幸公云

故叔父元洲府君墓誌

府君姓沈氏諱模字元洲一名章府學生世居吳江曾
祖諱珫明東充道按察司副使祖諱自南山東蓬萊知
縣父諱永智縣學生府君生而質直篤志為善不沾沾
於文藝其言信其行果其取與一錢不苟與人交不毫

毛背負見其善必喜而相勸退猶數稱之見有惡必怒
形於色面斥而痛戒之冀其即悛閑居每自檢其過有
過輒訟言於所親信者時已七十閱象山陸氏書感其論
學者病痛切深且悔且悲語畢而涕零不止形生五十三
年未見有能自治若此者吾叔父歟吾師也今不幸卒矣
其誰撫範乎我卒時府君年七十有二實乾隆五年七月
廿四日配王氏淑惠而勤先府君七年卒以乾隆四年十
一月十七日從塋朱村先塋西南兆之左子男二鳳鳴縣

學生鳳翔女一適吳志堅孫男三女二府君以卒之年十二月一日合祔王孺人墓從子彤銜哀而為其誌

都督洪公祖烈傳

洪公祖烈字定遠一字山峽其先休寧人祖暘客於蘇遂為邑之蘆墟人祖烈少負氣喜讀兵書慕古忠臣名將及長從當世名節士相砥礪中萬曆四十四年武進士授金山把總陞汀州守備天啓三年以安邦彥危貴陽調祖烈赴援至則奉巡撫王三善令勦賊攻金刀坑

克之攻平塘卧塘克之攻樂壩石骨等三十餘寨連克
之獲劉岡等二百餘戶圍蔡氏渡降之閏十月三善自
將兵督陳祖烈攻破畢節寨追奔至七山箐直搗大方
大方者賊巢也三善令祖烈赴省報捷總督楊述中令
護餉仍進巢往來數百里兵不過千人撞搪出入賊雖
衆莫能挫其鋒以功加銜副總兵尋以調兵澂江留鎮
偏橋會黑腳苗焚劫糧艘祖烈以二百人禦之敗苗兵
千餘苗復糾生力三千來致死祖烈扼險以待終不敢

督撫交章論薦而閹黨崔呈秀方為兵部尚書賊殺邊將荼毒正人知祖烈素從周順昌文震孟遊惡之格不得上崇禎初都城戒嚴命守西直門時中貴肆橫諸將爭屈膝祖烈投劾求去戎政尚書閔某慰留之尋調神樞營參將復調守湖廣黎靖忌者中以考功法坐降調歸既復以南京兵部尚書李邦華薦起補龍江水兵遊擊常憤時事數求去而本兵亦輒慰留累遷至後軍都督府都督時福王立南京祖烈屢上書言兵事不報

復與馬士英阮大鋮忤遂罷歸

國朝順治二年嘉善吏部郎錢棟籍鄉人為兵守禦延祖烈主其事俄而兵潰棟死祖烈乃仗劍入閩從御史鄭為虹給事中黃大鵬同守仙霞嶺三年八月

大兵至祖烈力屈擁見貝勒迫之跪祖烈屹不動貝勒壯而欲降之祖烈曰負國不忠辱先不孝不忠不孝何以生為明日復擁見令輸餉祖烈曰有餉則能戰何至於此嚼舌噴血大罵乃令驅出斬之祖烈奮躍奪刃刺

胸死是日為虹大鵬皆不屈死已貝勒念三人忠衣冠斂之祖烈門生王正梵僕進興扶祖烈柩歸葬於某縣某所子明楨高才生削髮入山尋卒

論曰余始觀殉國彙編知都督以守浦城死及觀蘇州先輩小傳復知其歷官率才與節并既得禮部郎洪琮所撰家傳觀之乃悉其前後事之詳琮撰都督傳本於其家孫琦所述行狀末叙死節事又其門人與僕所親見聞者較他書可信者多故今采琮語為本以作傳

至明史傳鄭為虹黃大鵬俱不及都督之死殆史館無
琮傳諸書或有焉而莫之信故耶若浙斜塘洪氏譜謂
都督歸老蘆墟是但聞其罷歸於福王時而不聞其入
閩後之死節也若以是而疑之過矣

檢討潘先生未傳

潘未字次耕幼孤資稟穎異嘗閱厯日一過能背誦及
長於羣經諸史九流之書無不讀詩賦古文辭無不能
而性好山水往遊燕趙因與一時名人交相討論題詠

康熙十七年以博學鴻詞徵試除翰林院檢討纂修明史既授職謂明更三百年史事繁委宜博采而精於考證分任而一其義例秉筆嚴而論平歲月寬而帙簡作議以上總裁並然之令撰食貨志兼訂紀傳自洪武以下五朝皆其所定

上平逆藩未獻平蜀平滇兩賦

上稱賞公卿傳誦論者擬諸李白云進充日講官知起居注兼纂修

世祖實錄

聖訓復為會試同考官得士十二人皆天下選而名益
起忌者亦益衆竟以甄別議坐浮躁降調而歸未初被
徵以母老力辭不獲命乃行除官後又牒吏部以獨子
終養請代題者三卒不得請乃受職遂迎母養之及去
職母歿終三年未嘗見齒後乃徧遊羅浮天台雁蕩武
夷黃廬中岳諸名山盡窮其勝各為詩若文記之四十

二年未已家居

上南巡復未原官閲三年

上又南巡大學士陳廷敬扈

駕欲薦起未未固辭乃止未於聲韻反切有神悟審五
方之音而能得其會通著類音八卷以為舊字母三十
六有複有漏今刪五增十九成五十母各具陰陽而列
以喉舌脣齒脣之序舊四呼以音就字無定準今各母
各韻並列四呼字缺而音悉全舊分類互有得失今統
有字無字之音辨其全分分平上去為二十四類入為

十類即少攝多正轉從轉旁轉別轉條理井然舊切同母同韻之字皆通用今同母之中必用同呼同轉同韻之中必用元音分陰陽蓋皆得天然之音而無有譌闕論者謂於古今音學中實成一家言晚究易象數有心得著論十三篇所為文甚多往往裨治體風教與鄉邑之利病蓋未嘗師事同郡顧炎武徐枋寶稟承其教其史學則自少得諸兄檉章賦學則未所自得也未詩文共四十卷名遂初堂集自京師來歸凡二十餘年年六十有三卒

茅鈍叟傳

鈍叟姓茅氏名星來字豈宿浙江歸安人七世祖坤明河南按察司副使即世所稱鹿門先生者也父耿字倫舒通史傳工文及詩以諸生終叟少聰慧嗜讀書為文才氣勃發而有義據年近三十為諸生屢绌於有司後遂專攻經史及程朱之書數年乃欲以著述自見念朱子近思錄舊解未詳密遂為之集註行止坐卧皆不輒歷二十餘年書成叟之才識亦因之而甚高叟嘗依族

叔祖某於山東滋陽時黃公叔琳為布政使數致候問
或勸之往謁叟曰族叔祖為黃公屬下某可出入其門
而不避嫌乎卒不往親知為州縣必懇懇為言安民之
法措置纖悉皆可施行或刻於催科則深痛其負國而
切責之雖其人面赤汗流不顧所著古文亦往往於國
維民瘼反覆致意足為後世勸懲者初叟以文高知希
致困厄年五十餘不復進取攜其橐謁金壇王耘渠汝
驤謁方學士於京師耘渠以為卓然大雅學士以為勝

宜興儲禮執叟由此名聞遠近而其近思錄集註及古文豪亦遂為士大夫所推重卒年七十無子今其桐鄉友人程藹園尚質方謀為次第刊行云

贊曰余與鈍叟交垂四十年叟嘗以不遇自傷圖所以不朽者余謂曰諸生而可以不朽其在為有用之言乎後又示所書劉峻傳後叙已與孝標有五同三異慨然流涕而庶幾知我者之論定余讀其文而深悲之今鈍叟雖不遇以終而著述之有用過孝標遠甚顧獨不可

名在青史哉亦何至復有同秋草之歎也

果堂集卷十

欽定四庫全書

果堂集卷十一

吳江沈形撰

行狀述告文哀詞

徵仕郎翰林院檢討潘先生行狀

曾祖志伊明廣西布政使司右參政

祖錫祚明湖廣布政使司理問

父凱

國朝贈日講官起居注翰林院檢討

江南蘇州府吳江縣潘耒年六十三狀

先生字次耕又字稼堂晚自號止止居士生而聰警善記或試之厯日過目背誦不舛落一字比長復得顧炎武徐枋王錫闡吳炎兄檉章諸君為之師友數年於經籍子史詩賦古文詞厯筭聲音之學課習討論遂無不洞達暇則遊覽名山大川尚志廓情不慕榮祿康熙十

七年

徵博學鴻詞之士左諭德盧琦刑部主事謝重輝以先生名上先生以母老固辭終不獲命而行抵都

召試體仁閣下擢二等第二除翰林院檢討纂修明史先生又牒吏部以獨子終養請代題三請三格乃受職先生謂有明三百年史事繁委宜博采而精於考證分任而一其義例秉筆嚴而論平歲月寬而帙簡遂作議以上總裁然之令撰食貨志而兼訂他紀傳自洪武及宣德五朝具有成稿十九年

詔更定殿廷樂章先生首上議增五事時逆藩悉定并獻平蜀平滇二賦公卿傳誦進充日講官知起居注兼纂修

世祖章皇帝實錄

聖訓初博學鴻詞之士之官翰林入史局也多進士出身嘗為官而朱彞尊嚴繩孫二君與先生皆自布衣與選及日講官起居注之添設而三人亦同入直又館閣應奉文非出三人手院長不謂然用是資格自高者既

莫不忌此三人而先生又精敏敢言每同列質所疑輒援據經史百子橫從應答無少遜避故忌者於先生視朱嚴二君尤甚甄別議起遂坐浮躁降調先生在翰林五年至是歸里四十二年之春

聖祖仁皇帝南巡復先生原官越三年

聖祖又南巡大學士陳公廷敬時扈

駕相見欲薦起先生先生曰止止吾初志也吾分也賦老馬行以謝竟不復出先生家居凡二十餘年遭母喪

哀毀骨立哭其兄若弟過時而悲贖其兄之子為民邊外者婚嫁殯葬其親故之尤貧無力者皆罄所儲為之其遊覽名山大川視布衣時益多其樂之而形於詩文亦益甚晚歲惟究心易象數與歷算之學以四十七年九月廿九日病卒平生慕古人之崇德尚功勲陳謨猷以濟時匡俗而非已之位所得為則遇其得為者莫不勸厲有不得遂輒憂虞不樂至出處進退又必辨之明持之嚴雖達可有為不肯或苟其性行如此故所為詩

若文多扶樹風節裨於治道卓然有立於聲音反切幼而神
悟及往來四方盡通其變乃著類音八卷以補訂前古音學
之謬闕其詩集十六卷文集二十卷別集四卷合名遂初堂
集與類音並刻行世其明五朝史稿若干卷藏於家適乎其
炳既述先生行乞銘於陳公廷敬又十餘年乃屬形為之狀
以備史館作文苑傳之采擇敢撰次其歷官行事如右謹狀

右春坊右中允汪先生行狀

先生諱士鋐字文升號退谷蘇州府長洲縣人相傳系

出新安郡為唐越國公華之後其家牒斷自明初諱得者為始祖得之八世孫廣東左布政使諱起鳳於先生為曾祖布政生沂州知州諱希汲沂州生鞏昌府岷州同知諱元絅是為顯考布政忤魏忠賢罷官以氣節聞於時沂州鞏昌並稱能吏而鞏昌尤敏辨善決疑獄先生少穎異好讀書有才略有作能下筆立成不加點竄與其兄武曹份右衡鈞皆以文學知名又喜為四方遊北入京南走廣西抵陝所至輒為士大夫譽歎康熙二

十六年中順天副榜閱三年考授鑲黃旗教習設法以
課其子弟多成立者先是祭酒釋菜先聖廟贊禮非其
人而教習期滿赴吏部試每十人以知縣用者八州同
用者二州同以缺少輒不得官先生乃言於祭酒吳公
苑曰聖廟禮嚴宜重贊拜之任請以教習攝考州同以
知縣用則官不濫而仕路通吳公領之後請於

朝奉

俞旨於是贊拜得人而教習補官無壅滯患實自先生

發之也先生既教習三年當以知縣用未及選中丙子順天舉人明年會試第一廷試二甲第一改庶吉士庚辰散館除編修尋入直南書房四十二年冬扈

駕西安聞父卒奔喪至岷州居年餘扶櫬南歸遂奉旨在揚州校刊全唐詩服除補官以四十六年夏赴京特陞右春坊右中允兼翰林院編修充日講官起居注未幾轉左自先生入翰林及預講幄每奏對進講獻所為詩若文多所裨政治不徒以闇博辨麗為能以故

上特重其才與志頻加褒寵

賜御書硯筆珍饌瓜果金帛甚厚且駿駿欲大用之以觀其效一時知遇莫與比倫其有鞏昌之喪也

上賜以白金百兩兼命官給輿馬資俾奔喪歸櫬先生至岷州而鞏昌公所遺官馬六百餘匹無接養者先生慨然曰是

朝廷馬也其可坐觀遂留與其兄弟出私財牧養蕃息及領馬官至乃扶櫬歸初洮岷道黃志嶂欲丈量青山

加賦。翠昌公力格其議，連被侵冤，用是發憤卒後。志璋復從患臨，翠布政使將行於所轄西府，先生聞痛哭力陳不可，狀事竟得寢。又疊藏橋者，翠昌公所建也。歷十年矣，會夏水暴至，橋齧民沒，馬死者衆。先生即倡議捐金錢建橋，如故。岷州人咸德之。四十七年以丁繼母憂去官，遂不復補閒居無事。卜宅於京師之日南坊疏泉種樹，日賦詩著文，臨古書法於其間，以自娛。其為文喜談吏事，有所見輒反覆論議，曉告當事，冀得用其言而。

澤及於民為書有奇勢橫縱自放而分間布白無分寸
失名公卿碑版多出其手以雍正元年某月某日卒於
日南坊第享年六十有六先生事兄如其父待朋友親
戚如其兄弟後進之有文行者稱道弗倦雖貧困未嘗
以非義干人人以急告必曲為之盡故其生也則莫不
感既卒也則皆惻然以傷先生所撰書其奉

敕纂修者全唐詩外有皇輿全覽陝西省若干卷自編
進呈者有長安宮殿考二十卷私輯者有近光集二十

八卷四六金樽十二卷瘞鶴銘考一卷行世全秦藝文
志若干卷三秦紀聞若干卷華嶽志六卷玉堂掌故若
干卷元和郡縣志補闕六卷近光餘集若干卷賦體麗
則若干卷皆藏于家其自著秋泉居士集若干卷亦家
藏未刻配某氏某人女繼配某氏某人女子二人連萼
山東沂州費縣知縣連芳國子監生沂州公與先曾祖
同舉於鄉最相善其後以女妻翠昌公未昏而歿於兩
家世好先生固余父行也今連萼又與余善出其所條

事件請狀於余以丐當代大人先生之銘余不敢辭謹
撰次如左

翰林院編修贈侍讀學士義門何先生行狀

曾祖思佐生員妣楊氏

祖應登生員妣陸氏

考棟生員妣陸氏吳氏陳氏

先生諱焯字屺瞻蘇之長洲人其先有某者元元統間
以義行旌門先生取其事名書塾學者因稱義門先生

少讀書數行齊下為文才思橫發及長博學強識敦氣
節善持論名重吳中康熙之二十四年先生年二十三
由崇明縣學生拔貢國子監時崑山徐學士乾學常熟
翁祭酒叔元方收召後進其所善科第立致先生亦遊
兩人門而慎自持見事不苟義且加譏切其後交絕於
翁復干徐之怒至辨訟於大府故累躡京闈而名益重
四方莫不聞四十一年冬

聖祖南巡駐涿州

召直隸巡撫李光地語詢草澤遺才李公以先生薦遂
召直南書房明年

賜舉人試禮部下第復

賜進士改庶吉士仍直南書房尋

命侍讀皇八子貝勒府兼武英殿纂修及散館得

旨再教習三年明年丁外艱歸服闋丁後母艱初先生
選刻四書文行遠集數種流播遠近皆能變學者舊習
既從李文貞公遊得成弘先輩宗傳復刻示歷科程墨

三百篇及以艱家居益勤勵其窮六經翫五子以究極四書精蘊為著文之本根文貞公聞而喜貽先生書曰有明盛時治太平而俗淳厚士大夫明理者多蓋經義之學有助焉今無論已仕未仕稍有才氣輒慕為詩古文視經義如土苴子仍諱諱以此指授甚善先生又令學者從事史鑑羣籍擇所載治法之善者類為幾編更迭省想應舉以之對策當官度時地之宜而推行之凡家居五六年稽古育才不異諸生時其育才也且欲就

舉業而引之儒術故為教視昔尤粹云五十二年冬再以文貞薦

召赴闕仍直武英殿明年授編修又明年秋

駕在熱河有搆飛語以聞者

上還京先生迎道旁即

命收繫并悉簿錄其舍中書付直南書房學士蔣廷錫等視有無狂誕語檢五日無有間有譏笑士大夫著作詣近科文者黏籤以進而書中所廁辭吳縣令餽金札

豪并進焉

上閱畢怒漸解且嘉其有守簡數條

命內侍詣獄詰責先生各據實奏辨反報僅坐免官還

其書

命仍直武英殿方其被繫也危且不測而先生語言眠食如平常銀鑺中正襟讀易聲出戶外上奏數百言無一字脫誤守者驚服及仍直武英殿益感

恩修纂益力嚴寒酷暑不少怠歷五六年遂致疾疾劇

詔賜醫藥以六十一年六月九日卒年六十二

上曰何焯修書勤學問好朕正欲用之不意驟歿深可憫惜遂復原官

特贈侍讀學士

賜金給符傳歸喪

命有司存恤其孤先生蓄書數萬卷凡經傳子史詩文集雜說小學多參稽互證以得指歸於其真偽是非密疎隱顯工拙源流皆各有題識如別黑白及刊本之謬

闕同異字體之正俗亦分辨而補正之其校定兩漢書
三國志最有名乾隆五年從禮部侍郎方苞請令寫其
本付國子監為新刊本所取正而凡題識中有論人者
必跡其世徹其表裏論事者必通其首尾盡其變論經
時大略者必本其國勢民俗以悉其利病尤超軼數百
年評者之林蓋先生才氣豪邁而心細慮周每讀書論
古輒思為用天下之具故詳審絕倫若此暇時喜臨摹
晉唐法帖所作真行書並入能品

聖祖嘗命書朱子四書章句集註奏

御嘉獎

命即鋟板會

上崩未頒發板貯內府所著詩古文數百篇皆追從唐之作者詰古齋識小錄數冊多刪取諸題識為之繫獄時門人某妄意中有忌諱悉取投諸火或傳其藏弃於家云先生事親孝謹於諸弟能推財讓產餽遺雖親故不妄受而於親故貧者咸有恩晚歲落官入直芻米僕

賃不給其不妄受也自如門人有才而貧者恒飲食於家而教之凡著錄者四百知名者三之一超卓者十餘人夫人王氏忠烈公佐聖孫女亦讀書知大義能輔成先生志子壽餘一名雲龍生員彤遊先生門五年承其學行頗有所記憶先生歿時復訪求積十餘載得寔多戊午己未間史館蒐天下名人事跡迄今六七年曾莫為之狀以應乃就所見聞擇其大且要者考核而詮叙之以補獻史館備文苑傳之采擇乾隆九年八月朔旦

門人吳江沈彤謹狀

述先師儀封張公訓

雍正三年二月某日彤在南陽閔邸抄知吾師禮部尚書儀封張公卒泣然流涕痛無所承學將昧陋以終其身又恨數年來病且貧不克致身京都益薰公之德於未沒時也既念曩者從公蘇州聞公之訓輒感愧奮厲今當追述其語時觀之以自警云初彤謁公於蘇之葑門請問為學之要公曰朱子不云乎主敬以立其本窮

理以致其知反躬以踐其實學之要盡此三言他日復
往謁公公曰論語言君子喻於義小人喻於利老氏貪
生佛者畏死烈士殉名皆利也利獨在貨財祿位間乎
審其途而後志可得正焉後宗老欲得公題先太常祠
額遂往請明日使奉寒謨遺風四大字至彤徃拜賜曰
祖考之光公曰是奚足哉孝經云立身行道揚名於後
世乃光也有耻所以立身自強所以行道聞爾加意宋
五子書且五六載苟專志不懈其於道也何有又曰我

少而志道功之加有誤焉者中歲以來始識其正持身
臨民無敢背違然且多不愜於志近者欲復將程朱之
書而盡心焉老年精力銷亡吏事繁殆無暇日所望正
在後生輩耳子之年幾何對曰二十五矣公曰方少壯
其必勉之形于是請為弟子公始以江蘇巡撫劾貪殘
不法大吏大吏亦姦欺誣劾故待

命於葑門既

聖祖遣大臣讞奏者再

聖祖以讞奏皆不實削姦吏籍還公任時形以疾不進謁明年春當應鄉舉形病甚公聞賜之藥餌且傳語曰心之動也不妄即病無由作作亦易瘳五子書足以養心讀不可輟應鄉舉非要事旨之鉅儒或以布衣終老而獨善其身無不可者後形病少差入署謝公喜問比所讀何書對曰連太極圖說定性書西銘而讀之公曰善三篇者雖各自為文而義實相貫聖人定之以中正仁義而主靜故能以其情順萬事而無情知化窮神所

以定之也不愧屋漏存心養性君子修之之事也其效
則廓然而大公物來而順應害仁濟惡大率患在自私
而用智苟如是則為悖之小人也必矣其不然乎竊惟
公欲以已之所得者推而致諸人人故苟有來學必反
覆指誨又懼人徒事言語不反求諸身心也每陳說古
義隨人與事曲為摩切故以形之薄劣亦幸得與聞其
訓數千言性短於強識歷年遠多所遺忘顧即是所述
而致其功亦可以不終於昧陋也已

先考真崖府君述

府君諱始樹字景馮晚自號真崖又號雨聲姓沈氏世為吳江人七世祖奎明贈刑科給事中六世祖漢戶科左給事中卹贈太常寺少卿予特祠曾祖諱珫究東道按察司副使祖諱自南博學工文詞

國朝蓬萊縣知縣考諱永智字四明能詩以諸生終妣金氏孺人府君四明公長子也性耿介不同俗善發明潛德而於物無不受少嗜經史百家之書年三十遂棄

舉子業窮日夜觀之興到即手自抄錄加詳於隱臘復好山水於吳越間勝區常典衣遊覽每當雲興鳥鳴花發之際流連不舍曰吾以觀天地之生機用此老其身當秀水朱檢討彝尊之在吳郡選明詩也府君持先集往謁遂相與論明一代人品事跡無彼此抵牾者次及其他史及古經雖註釋評論往往能舉誦不爽檢討驚歎以為能世其家之學也晚歲閱義理多益善持論聽者每頤解心悅而去所著詩古文格甚高然多自毀棄存

者僅數篇府君遇富貴而無行義者非面斥之即微辭刺譏至於修行篤實君子雖貧賤必誠心愛敬稱道不憚以故謗與譽常相持給事公奎敦行孝弟具列周恭肅所撰墓銘而郡縣志軼不載府君數數為宗人言會雍正中有

詔祠祀古今忠孝節義者即命形偕族黨告諸有司給事公遂列於祀又太常公祠舊以子孫之賢能者從饗曾孫自然文行並高私謚曰孝介無後竟

莫之及府君乃徧告族人得如常例外祖妣趙氏孺人
年二十七而寡苦節五十餘年無後未及請旌府君
每為之太息後亦以其事屬彤云

乾隆六年題旌七
年得旨建坊送

木主入吾家世有恒產自副使公轉家租食官署而始
節孝祠

貧至府君遂困有時不舉火而平生不一以財干人親
黨以危苦告切於身受又常急人而緩已焉凡遇物之
生且長也雖不便於已亦委曲遂之於微蟲細草皆然
府君生順治十五年五月二十日乾隆二年正月十九

日疾卒享年八十配楊氏孺人年二十四來歸孝順勤儉以其年十一月二十四日卒實康熙之二十三年繼配吳氏孺人讀書能曉大義動止有則康熙四十八年五十二十二月十日卒自有述以雍正十一年十一月十九日並葬縣西北范隅鄉朱村先兆之次子男三長即彤縣學生貟次旦幼薰一女適舉人徐源府君之疾也彤以往年試大科尚滯京師薰亦謀菽水於保定獨旦在家以書聞至七日遂卒四叔父發書惟告疾革

書遲留得於二月之晦形展讀驚悸惶恐倉卒就道及抵家而府君卒七十餘日矣痛無能顯吾親顧不得及親之終也而送之哀號悲泣心志荒迷歷四五月今擇以十二月七日合祔兩孺人墓乃得省想府君之性行而忍淚述之以求立言君子之銘焉謹述

先妣吳孺人述

孺人姓吳氏吳江人八世祖璋明贈太僕寺卿世號全孝翁曾祖河南按察司副使諱瑞徵祖

國朝封工部虞衡司主事諱恪考縣學增廣生諱之紱
妣申氏黃氏孺人黃出也自幼習詩書知禮法有淑慧
聲及笄侍父母疾夙夜奉湯藥惟勤年三十歸府君為
繼配幽靜端莊不苟言動家貧屋舍偏仄而外內截然
適舅姑之所問答進退皆中儀則在室而績麻治繭綴
衣入廚而汲井執爨無不整其容慎其作止雖燕居亦
自檢束無怠也吳中風俗每二三月婦女入尼菴禮佛
宅南有小菴相去數武尼數以時來請孺人固辭終其

身未嘗一徃初孺人抱重疾而府君病癰及寒泄孺人
節時其衣褥飲食親理藥物手浣濯其不潔一不自顧
藉以務愜府君心及數月府君得瘳而孺人疾益甚綿
延二載遂卒實康熙四十八年十二月十日順治十五
年六月十五日生享年五十有二子男三長即彤縣學
生貞次旦幼薰女一適縣學生貞徐源彤生六年讀千
字文與孝經孺人課之形就外傳而夕也聞前言徃行
而識焉孺人訓之形之成童也志在有立孺人則因事

而勵勉之今形且二十四尚未有以稱孺人之所期而孺人已前卒教督冥然杳矣悲夫悲夫孺人卒之三月形遂病病踰年稍差乃能追憶孺人之性行及嘗聞諸府君舅氏者而私述其概云謹述

陳諒直曰沈子述考妣二篇事約詞質不飾與夸古孝子之用心也李習之方希古輩必有取焉

立後告先府君文

維乾隆二年九月十日哀子彤敢以清酒庶羞昭告於

顯考真崖府君之靈嗚呼考之願有冢孫也其來舊矣
乃年躋八十而卒未之遂以逝哀哉又旦也亦恒生女
而不生男薰生男而殤妻死未繼致考以老壽終曾不
得一孫男之嗣嗣於几前也形伏念三年之後形即有
男望其於春秋之薦克奔走而跪拜也其期尚遠况形
已五十即不敢致毀畢喪血氣必更衰安能期其男之
必得耶從弟鳳鳴之次子達年十四矣安重有本心近
而助奠遠而傳重教誨以穀或克並勝其任因請於四

叔父更名培本立以後形而為考之冢孫嗚呼形不能修德獲嗣以慰考心今賴旁支上續正體伏冀尊靈夙夜昭鑒保其體而誘其衷敢告

汪峻堂哀詞

汪君峻堂年二十九以貢生應浙江試歿於旅舍凶問至吾邑有哭之慟者有垂涕灑淚者有長太息者紛紛然驚始疑卒謂其人不當死而死雖平生不相識之人且然其族姻知舊無論噫吾所見尊榮壽考者之死多

矣曾有能得此於人者乎峻堂歿之前數年嘗應試京
闈時余方在都見館閣諸老先生及太學所集四方名
士見其詩若文者無不稱其才李詹事紱徐侍讀用錫
尤器重之二先生負海內文學重望者也邑之宿儒周
先生振業於周四子宋五子之書咸窮極窪與其教人
必文與行兼雖從遊以老者或不能得其一言之褒而
峻堂以早歲受業輒見許可由其生之文譽死之見傷
而其有所得於已及乎人皆可知矣且以知人無不可

感而無以感人者為徒生也峻堂名棟其先自休寧徙吳江雍正中析吳江置震澤遂為震澤人生而厚敏好讀書為詩文秀出時俗持躬慎飭寡言笑於六行無不敦敬禮文儒而博愛於衆告之急難雖路人必拯焉余與峻堂交跡踈而心契峻堂始歿一月三夢余若有所請然覺輒愴焉靡已乃為詞以抒予哀且以報峻堂之意其詞曰

哀哉汪君窮年兀兀以為學而天乃不大其年惟日不

足以為善而不得日之富於天胡靳其文行之大就使
其風弗藹藹以騰騫抑且孤吾黨之講習而麗澤之氣
壹鬱其不宣哀哉汪君抱良材以早世齋高志而沉淪
生而不薄於儒宗詞伯死而痛惜於里黨與交親雖命
塞而形夭尚有所不夭者存嗚呼汪君

果堂集卷十一

欽定四庫全書

果堂集卷十二

吳江沈彤撰

詩

幽蘭為儀封先生作

幽蘭發空谷蔚為王者香
香風滿四野素姿凝清光
脉含深情獨立遺衆芳何堪蕭與艾
結交當道旁蕭艾滋露華
幽蘭罹嚴霜光風一以轉採採充佩纓

游豐山

晨起尋豐山登降恣幽討山頭灌莽深山根淺水抱清
冷杳無淵更莫拾朱草髮鬢霜鳴鐘指點數亦少名跡
總荒蕪舊刻空文藻延佇增感歎去去蒼煙繞

南陽郊外看梅花

我有梅花癖郡齋迺無梅聞說東郊外一株橫水隈驅
馬行十里見此繁花開薰日覺香暖藉草因銜杯憶我
江鄉遊到處花皚皚春風起山谷香氣氤氳來月出寒

光滋吟賞猶徘徊勝事今豈得聊慰飢渴懷

冬至前一日郡齋小集分韻得叫字

仲冬陰正窮雨歇開返照列坐撥爐火鬪飲恣歡笑鄉
思忽難任南雁衝寒叫

送別全紹衣吉士

君從山陰來復向山陰去來時暖若蒸去日雪如絮迢
迢千里程不得五日住學案全補續黃黎洲書未全窺宏詞已
飽餽鼓棹竟衝寒別與幽人晤把筆念狂言應有傷離

賦

贈陳諒直

陳子我畏友豪邁見天性弱冠同門牆才調便縱橫讀
書具隻眼穿穴契賢聖上下三千年羣史歸心鏡暇時
對明好清風生塵柄徃復期切劘古道人所敬晚來慕
修養萬象歸一靜陶冶無故氣清心玉壺映當年抱朴
子寡欲保妙命丹井一以洗雙燕徃來輕自嘆老更拙
未脫人間寃對子一披襟流輩徒悵悵

寄何子未

憶昔弱冠日業從哲匠授古籍時討論與君如蘭臭阮公具洞鑒仲容實稟秀澄懷契名理細意研句讀學成少知已時命徒平謬抱影寄空廬一貧真蹇陋憐余亦同病年來更老瘦身名一無成共守家風舊

贈陳和叔

大鵬負青天斥鶩笑不置飢驥馳千里駕駘飽還忮吾友湖海豪自少懷遠志讀書鄙訓詁往往通大義論史

尤縱橫卓識拔前幟愁絕梁父吟管樂常儗議高才肯
折節傲骨取時忌長安初同徵嗜好與俗異西山賦崔
嵬南國空返轡只今還落拓遊覽頗恣肆跌蕩公卿間
不合輒掉臂男兒志垂名區區那足計寂寞勤著書豈
為覆瓿事何代無英雄窮達等游戲

懷席寶箴

時在虎止

百里路非遙背面忽七載相訪各有期事隔兩相待寄
我平生詩歷歷高情在高情近若何北望秋山藹

題張禹懷印譜

鑄印貴淳樸其源自秦漢摹神勿摹形剥蝕乃銅爛得
訣久已希良工復爾算一譜遠寄將古意滿几案在昔
顧與徐云美
龍友吳中共嗟歎斟酌形神間誰歟登彼岸

寄示南耘

立言貴有物澹泊蘊真味至性植根本經籍資灌溉前
輩豈率爾時流競塗堅昨閱偶存草喜汝無客氣汨汨
山下泉疏濬通大川悠悠山下路重繭造其巔窮達有

時命學殖在盛年嗟余已老矣所望惟汝賢

憶虎丘王蘭

虎丘玉蘭天下無昨日臨眺山巔廬花開萬朵白日中
疑堆十斛明珠珠華精迥奪遊人目香飄入鼻幽且殊
酌酒啜茶恣吟賞明月未到還踟躕書堂今朝風雨發
蕭蕭山側花何如

即事

江鄉民苦飢推食與民食飢民一染指有司多菜色

釣魚歌題凌支南真

愛釣非愛魚無魚心亦足閒把一竿行迴塘汎秋綠

聞說

聞說江鄉雨浸淫湖海間雷轟纏十日蛟怒裂三山是
屋愁風破經秋恐食艱旅人歸未得垂白那開顏

屢聞望谿先生論古有作

問古知何處桐城路不迷窮山開石磴障水築金堤馬
繫班應遜韓醇柳豈齊一朝心頗豁數月耳從提

對鏡

羸顏行若此不為病纔蘇骨但凌嶒見心仍勇猛無作
詩耽好句為客分窮途相對秋風裏憐吾又笑吾

過軒雲弟平原幕舍

京華一送爾數載獨家居此日纔攜手明朝又跨驢行
蹤皆不定生計竟何如欲別無他語加餐數寄書

客中九日有寄

客裏逢佳節登臨何處山片雲林外澹流水寺前灣帽

落葉房冷盃傾菊蕊斑踞湖多勝事知爾獨開顏

十五夜同人集明月軒得枝字

共是悲秋客
中秋更悲
開尊稀舊雨
見月憶南枝
烏鵲飛無賴
星河見幾時
良宵須痛飲
漫作楚人詞

客南陽
頗乘興
游覽時秀水
鄭秀才邁苦跨馬
每不克偕因貽詩解嘲率爾奉答

尋幽本不倦
無伴每含愁
山好憑誰賦碑
殘祇獨搜淮
源穿地涌清水
逆崖流間渡
非無處君能共載
不

懷徐被廣

悲君滯城北身世久相違頭白生涯冷家貧過客稀一
尊聊撥悶數卷足忘飢余亦甘寥落秋風共掩扉

雪次日枕上作

天曉寒侵被聞呼雪更狂不知深幾尺昨已積平場弭
毒人無恙凝精穀有祥汜勝之書云雪為五穀之精見初學記最歡明歲
好急起看籌量

立春日送陸朗夫兼呈內閣董學士

才子方多感欣承學士招一弓傳臘底雙槳發春朝殘
雪看消嶺新花擬布條坐餘知我問書圃自逍遙

中頂觀荷

蓮渚依中頂亭亭立萬花出波披曉日倒影散餘霞風
定香仍遠涼生淨莫加何當開十丈即此是西華

槐陰納涼

秋至暑尤酷槐陰氣獨涼微風隨露落圓月帶雲藏高
卧游皇古長吟入醉鄉婆娑生意好相對那相忘

題梁幼循秋水歸颸圖

夾水丹楓映碧天，短帆歸去孝廉船。
吳山路迴燕臺杳

兩地思親倍黯然。

幼循杭州人。尊甫司農公在朝祖家居

舟行即事

清江水漲浸吳田麥，腳時平荇帶牽日暮。
船頭風又急，四山雲起接村煙。

題畫

翠蕩瑤翻水拍空，斷萍衰柳逐江風。
扁舟不肯依沙渚，

獨掛輕帆暮靄中



果堂集卷十二